

Գ. ր. Հակոբյան

## «ՆՈՐ ԲԱՅԱԶԵՏ» ԱՆՎԱՆ ՄԱՍԻՆ

Մենք հաճախ ենք լսում ռադիոյով ու կարդում «Սովետական Հայաստան» և ուրիշ թերթերի էջերում «Նոր Բայազետ» շրջանի անունը՝ մյուս շրջանների անունների շարքերում: Բայց ո՞ր տեղից է կպել այդ անունը Սովետական Հայաստանի գեղեցիկ շրջաններից մեկին և ինչու՞ մինչև հիմա մնացել է անփոփոխ, այն էլ Նոր Բայազետ ձևով: Հենց այդ «Բայազետ» անվան մասին է, որ ուզում եմ երկու խոսք ասել:

Նոր Բայազետ անունն իրենց հետ բերել են այսպես կոչված հին բայազետցիները, որոնք 1828—1829 թթ. ռուս-տաճկական պատերազմի ժամանակ գաղթեցին իրենց բնաշխարհից, եկան Ռուսահայաստան և բնակություն հաստատեցին Սևանա լճից ոչ հեռու՝ Գյավառ կոչվող գետակի վրա՝ նախկին Դեղարքունյաց գավառում: Շատ գաղթականներ եկան նաև Այաշկերտից, որոնք բնակություն հաստատեցին այժմյան Մարտունու շրջանում:

Սակայն որտեղից է հին Բայազետի շրջանն ստացել այդ անունը:

Արարատյան նահանգն հնում ուներ քսան գավառ: Այդ գավառներից մեկն էր Կոզովիտը: Այս գավառը տարածվում էր Հայկական Պարից հարավ, Մակու գետի վերին և մասամբ միջին հովիտներում: Բնակիչների մեծ մասը հայեր էին և Ջալալցի ցեղին պատկանող քրդեր: Այս շրջանն հայտնի էր Արշակավան քաղաքով և Դարույնք ու Արծափ հռչակավոր ամրոցներով:

Յավրուզ (արնախում) սուլթան Սելիմի հայրը՝ Բայազետ Բ-ն, 15-րդ դարում պարսիկներից գրավեց Արևելյան Հայաստանի շրջաններից մի քանիսը, որոնց թվում նաև հիշված Կոզովիտի գավառը:

Սուլթան Բայազետ Բ-ն Կոզովիտի գավառը, հատկապես Դարույնք և Արծափ անառիկ ամրոցները շատ դժվարությամբ նվաճեց պարսիկներից, ուստի, իր քաջությունն համբավվոր և անունն անմահացնելու համար Կոզովիտի գավառը վերանվանեց իր անվամբ՝ Բայազետ: Ընդհանրապես օսմանյան բռնակալները սիրում էին իրենց գավառները վերանվանել իրանց անուններով: Արևելյան Եփրատը մինչև օրս էլ տաճիկները սուլթան Մուրադի անվամբ ասում են «Մուրադ շայ» կամ «Մուրադ սուլ» Սարիղամիշի և Ղարսի միջև եղած խճուղու վրա գտնվող նախկին ռուսաբնակ մեծ գյուղը մինչև հիմա էլ կոչվում է «Սելիմ քյույ» (գյուղ) յավրուզ Սելիմի անունով, որը Մուհամետ Ֆաթիհի թոռն էր և հիշված Բայազետ Բ-ի որդին:

Եթե անհրաժեշտ է, որ Կոզովիտից 1828—1829 թվականներին Գեղարքունիք գաղթած մեր պապերի ընտրած նոր բնակավայրը պահպանի նախկին բնակավայրի հիշատակն ու անունը, ապա ավելի նպատակահարմար է, որ այդ շրջանը կոչվի ոչ թե «Նոր Բայազետ», այլ «Նոր Կոզովիտ», նոր Դարույնք կամ նոր Արծափ, նախկին գավառի հայտնի անուններից մեկով:

Եթե մենք իր ժամանակին մի շարք վայրերի անուններ, որոնք կապված էին մեր երկրի այս կամ այն միապետի անվան հետ, կոչվում էին նրա անունով, փոխեցինք՝ ինչպես օրինակ՝ Ցարիցին, Պետրոգրադ, Ելիզավետպոլ, Ալեքսանդրոպոլ և այլն, ապա ինչու՞ պետք է մինչև հիմա Սովետական Հայաստանի շրջաններից այնպիսինը, որը տվել է Սարուխանյանի, Բաղիկյանի և ուրիշների նման ունյուցիոն պայծառ մարտիկներ, կոչվի մի արնոտ բռնակալի՝ սուլթան Բայազետի անունով:

Թող զարմանալի և խորթ չթվա, որ «Բայազետ» բառը ոչ մի կապ չունի Հայաստանի աշխարհագրության ու նրա ժողովրդի պատմության հետ և ոչ էլ աշխարհագրական տերմին է, չնայած մեր գրականության մեջ բավական գործածվել է:

«Նոր Բայազետ» կոչվող շրջանն ունի իր պատմական և գեղեցիկ անունը՝ Գեղարքունիք: Թող համապատասխան մարմինները բնեն այս հարցը և այդ շրջանը վերանվանեն կամ Գեղարքունիք և կամ այդ շրջանի տված ունյուցիոն մարտիկներից մեկի անունով: